

可園文存

可園文存卷十二目錄

事略

先世行略

叔祖觀察公行略

先考行略

先妣事略

仲娘殉夫事略

繼室趙孺人事略

誄

周芝軒處士誄

甘劍侯大令誄

張太夫人誄

周柳潭署正誅

秦伯虞司馬誅

哀辭

仲子詒祿哀辭

可園文存卷十二

江甯陳作霖伯雨

事畧

先世行畧

陳氏之先世居河南

七世祖錦庵公

諱上棟下字之棟

於明季辟

亂渡江占籍江甯

國朝補廩膳生配金太君生

六世祖渭求公

上諱朝廷之

聘之補縣學生配劉太君子二長卽

高祖在東公

諱奎妻次

叔高祖楚珩公

諱圭璧

配徐太君早卒無子在東公援例

爲國子監生後以孫官贈中憲大夫公平居習貿遷業每以

不讀書爲恨其延師教子也所奉束脩常浮於其數人怪之

曰吾子成敗繫乎師豈可以錙銖較哉噫今世富貴之家縱

可園文存

卷十二

一

子不教而專刻薄其師者聞之可以風矣配崔太恭人子三

長 伯曾祖樹南公

上諱志道之志下諱嚴疑之疑

縣學生次卽 先曾祖

中憲公

諱指授之授

與

叔曾祖立賢公

諱掄才之掄

同生立賢公援

例爲國子監生

中憲公字石渠號松崖早以文學稱於時

工書善舉子業生平篤信程朱而治詩禮則主漢儒旣補諸生交游益廣皆里黨知名士以道義相助無阿徇 在東公棄養後家中落有稱貸先人者貧不克償輒還其券先後不下數百金父友蕭某客死六安子幼不能歸葬乃代營貲助爲返其喪事母至孝侍 崔太恭人疾不解帶者累月槭窬之褻皆躬親之尤虔於祀先將祭必齋遇有時物非薦莫敢食至特殺則終身戒之曰吾非佞佛不過養惻隱之心以求充吾仁耳其訓子最嚴篝燈課讀無閒暑寒卽受室後猶不

能免夏楚也子婦辨色必起平明問安而退每旦皆然上下

整肅門以內無嬉笑聲言家法者推陳氏焉樹南立賢二公

皆早卒公事寡嫂以敬撫猶子以恩一嚮之甘必均分之從

伯祖詠之公

上諱維持之維下諱鍾鏞之鏞

樹南公長子也艱於小試督責

過諸子後竟補府學生第一餘亦視其材之所近俾各執一

業厥後皆能成立公之力也有姊適徐嫠居無依迎歸養之

終身並爲嫁其孤女家貧授徒盡心指教於寒士尤不敢忽

嘗有貧欲廢讀者不取其脩脯轉以膏火助之成就後進甚

眾如雲南布政使姚錫華監察御史范承祖皆及門之最著

者性好施予嘗謂孤窮嫠婦存活較難乃與同志者倡建同

善堂按季分卹歲暮復自措貲散給錢米沿戶親送敬謹禮

揖不敢仰視至於貞女廢疾輩周之更厚先是下關有救覆

舟者爲胥吏所誣累由是相戒袖手公復議建救生局募造紅船冒風巡江每歲中活人無算其章程皆公手定至今猶遵守之嘉慶甲申歲大饑罄歷年所積束脩二百金易米減價糶於門外令諸子分日親守之非素識之貧者不得售售亦不得過數升展轉爲之金盡而止每夜必懷餅餌散錢至街巷僻處以予餓者雖大風雪不少懈又製棉衣數百領施給貧寒所費不貲卽家中女紅所入之錢亦取以集數同時如伍孚尹封君光瑜甘夢六贈君福輩皆樂善不倦而公以寒儒周旋其閒名與之埒故人以爲難又嘗有相識市肆失銀數兩疑其徒竊之備加凌逼公適至曰此銀我頃取用未及相告毋庸覓也明日質衣還之事遂解旣而肆中掃除得銀於地隙主人乃慙謝公之克己利人類如此年五十六卒

以子官贈四品階同治十三年里人哀軼事上請奉

旨准祀鄉賢祠配蔡太恭人治家勤儉子四長伯祖价之

公上諱維持之維廩貢生試用訓導次卽先祖中書公諱

同下諱次叔祖觀察公上諱同下諱事蹟別見行畧中

次叔祖寄芸公上諱同下諱附監生中書公字豐之號

星台幼敏慧應童子試以水仙花賦受知於邑侯錢恕堂先

生是年與叔祖觀察公同補諸生歲科試輒冠其曹文名

噪甚嘉慶戊寅恩科舉於鄉明年又與觀察公同成進士

除內閣中書時蔡太恭人以疾卒於里公素純孝是日在

都忽煩躁不安宵又得噩夢乃謂弟曰吾夢不祥必吾母有

故也何以官爲投牒遽歸哀毀骨立以貧故假館廬州旋丁

中憲公憂座主帥仙舟中丞延主杭州紫陽書院講席服

闕赴官京師充

文淵閣校閱雖經通籍儉素如諸生時平居謙和與物無忤
尤好施予有父風年三十五卒先是爲中憲公營窆多事
有梅某以堪輿名卜得一壤葬有日矣他葬師以有水告而
梅某護前堅不肯承諸兄弟疑莫能決公慮其廢事也乃焚
香以祝曰如有凶耗願集於我躬已而果然价之公痛之
旣改葬中憲公於前新塘曰吾聞諸葬師云是地左偏尤
吉吾不忍據其以吾弟祔焉故公墓居左配李太宜人年二
十一來歸善中饋事能得舅姑歡心及居京邸主內政益有
方寬和御下僕媼皆喜中書公沒時家君僅八齡太宜
人攜之歸寄食於伯叔閒數歲長姒吳孺人卒供贍漸薄或
竟日不得食太宜人置不校曰吾命薄磨折其分定也倘

良人在何敢然況伯已惑於讒訴必不察卽察矣而使人家
室不睦吾又不爲受枉無妨但願吾兒有成一吐此氣耳於
是自紡績以食未幾家君補府學生食廩餼館穀豐給太
宜人心始慰嗣以守節年例符被旌咸豐初粵賊陷城家君
奉太宜人轉徙江淮間貧窶日甚太宜人處之若素性
最曠達每曰死者歸也精氣竭矣如我死毋或諷經拜懺以
娛人耳目也年六十九卒於寶應鄉寓時己未年九月十二
日也同治三年春家君夢太宜人言笑如平生曰家鄉不
久當復吾欲歸矣是夏金陵果克其明年家君奉太宜人
匿歸與中書公合葬焉

叔祖觀察公行略

公緯維屏字建之一字劍芝 曾祖中憲公之三子也爲兒

嬉戲嘗學聽訟剖決明審 中憲公奇之曰是兒必爲能吏
好讀書文有奇氣年十五補諸生旋舉嘉慶癸酉科鄉試己
卯恩科成進士以知縣簽分山西歷知榆社浮山太平縣事
皆有政聲道光壬辰科充鄉試同考官解首焦某其分校所
得士也尋遷陽曲知縣有治劇才擢潞安府同知性兀傲數
不合於上官然遇難治事則必檄公往故中閒兼攝者忻解
絳平定等州知州蒲州澤州潞安等府知府所在稱治河東
監掣同知職司鹽羨膏腴缺也公嘗署之上日商以白金三
千爲贄公拒不受未幾直使查辦鹺務以賄劾者纍纍而公
獨免同僚莫不服公之先見也咸豐辛亥恩科充內簾監試
官當是時

文宗登極銳意吏治公以循良薦奏對稱

自三年擢廣西柳州知府會山西有警留辦澤潞防務公聞賊已逼境知太行有隘道可守欲先據之乃率數十人兼程往登山巔以望見賊方蟄附上時軍械尙未至從者惶懼欲遁公曰賊眾我寡退必不免令裂裳爲帛徧懸林閒發鳥銃以驚賊賊駭退轉入河東其應變急智類如此俄升廣西右江道年六十有七卒公宦遊四十載所得廉俸常以振卹族姻於孤寡尤加意及沒家無餘貲著有詩賦題解韻編操觚者家置一函焉子元孚字允齋選補廣東鶴山知縣

先考行略

先考姓陳氏

上諱元亨之元
下諱恆久之恆

字葆常一字月樵號景陸世居

江甯

先曾王父松崖公邑增生好行其德里人所稱石渠

先生者也以子官贈中憲大夫後入祀鄉賢祠 先王父豐

可園文存

卷十二

五

之公嘉慶戊寅恩科舉人已卯恩科進士內閣中書舍人
文淵閣檢閱

記名軍機章京 曾王妣蔡贈太恭人 先王妣李封孺人
晉贈宜人旌表節孝 先考生性敦篤弱不好弄 先王考
中書公棄養日年甫八齡 先王妣李太宜人自京師攜之
歸孤苦零丁相依爲命 先叔祖劍芝公時方作令山西賴
其扶助得免飢寒稍長好讀書善屬文歷從 先伯祖价之
公 先叔祖寄芸公學復受業先姑祖夏紫駿先生壑之門
年十八學使者仁和龔文恭公守正按臨歲試補府學生是
年吾 母李宜人來歸 先太宜人姪也事姑婉順以女紅
佐日用由是 先考得專力於學復向張紫荊姑祖鎰及姚
瑞庭孝廉天麟而就正焉課餘定省依依如嬰兒事必稟命

不敢專行年二十四食廩餼於四十人中肄業鍾山書院山
長王炯齋祭酒煜激賞之屢拔冠其曹歲科試亦頻列優等
文名日噪 先太宜人顧而樂之惟深慮獨子遠離己酉科
優拔弗令報考卽秋闈亦不甚盼望每曰安居樂業於願已
足以故 先考仰體親志庶藉課徒所入供甘旨未嘗作百
里遊咸豐三年粵寇陷金陵 先考攜不孝作霖奔竄中途
猝遇賊將掠作霖去 先考以身翼蔽之賊脅以刃不屈遂
均被斫血淋漓頭面開仆於地賊以爲已死舍之去嗚呼當
時使非 先考冒死相抗不孝作霖久淪爲異地之鬼矣欲
報之德昊天罔極每一憶及淚輒涔涔下也旣而辟地江北
由全椒而鳳陽而盱眙而寶應 先考傭書覓食雖蕩析離
居卒不忍違 先太宜人之側迨己未恩科江南借試浙闈

先考已赴江陰錄科聞先太宜人病星夜馳歸汜水侍醫藥十餘日躬視含斂哀毀柴立杖而後起旣遭大故家益貧日以豆糜充食明年遂出參鎮江烈字營軍事壘踞金山扼南北之衝每當出隊守陴羽書旁午磨盾揮毫輒終夜不寢府主武人性故悍忍嘗獲一童子以爲閒諜將殺之先考不可至以去就爭乃釋弗誅從戎三載屢瀕險危凱徹保五品藍翎先考恥以軍功爲名祕不示人同治三年金陵克復先考挈家返里未遑他務卽節縮衣食費用以歸先太宜人之櫬徒步往還備極勞瘁負土臨穴悲泣若初喪雖素不悅先考者亦莫不稱其孝當是時兵燹甫定弦誦之聲閭然先考復設絳帷從遊者雲集門牆之盛甲於一郡年五十獲舉丁卯科補行辛酉科鄉試座主爲劉鐫三通

政有銘王玉文編修榮瑄房師爲溫純甫明府粹之次年會
試報罷卽不復上春官援例以教諭試用兩奉藩司檄攝寶
應沛縣學篆皆辭不就惟一莅東臺未久輒歸湘陰左文襄
公宗棠總制兩江訪公正紳士於薛桑根山長時雨 先考
與甘建侯廣文元煥秦伯虞大令際唐同被徵辟入清丈及
水利局其爲當道推重如此龍江關有救生局 先鄉賢公
及諸鄉先達所創也 先考與同志規復之實事求是任怨
任勞見有因以爲利者必加斥逐不少貸他如籌公車費增
廣學額請免僉快運丁崇善堂卹養豐備倉積穀皆石東山
閣學楷經畫之修府縣志禁止青龍山開礦頤壽堂養老甘
棠文塾課孤童皆汪梅邨助教士鐸主持之方其創辦之始
遇有疑義莫不就 先考以決 先考不苟同不立異剖析
可圖文存

可否斟酌時宜必求經久無弊而後止又府學文廟移建於
治山同人爲設灑埽會 先考管理數年出入鈎稽不爽銖
綮並爲購置房產以爲香火之資江甯節孝祠舊在雨花山
亂後重建 先考以 先太宜人崇祀所在春秋祭日祝帛
豆遵必躬自檢點雖大風雨靡不往又以祭費之餘特製扁
聯以昭肅穆後乃稍稍謝去諸務惟廣卹清節局至今尙與
秦伯虞及姚一山明經桂馨甘子純博士塏陳月江茂才槎
分治之而綜其出納頃因經費漸絀慮無以善其後彌留前
一日猶頻頻語及之 先考誼篤同宗兼及族戚力所能至
弗吝周施每念 先觀察公眷屬流寓潞安貧不能歸輒爲
慨歎當丁丑歲晉地奇荒嘗措貲以寄之適周氏姑 先觀
察公女也初失所天外侮沓至 先考竭力護持克完其產

未幾歸甯於晉託 先考經紀一切每年必至六合全椒按
視田畝未嘗以非已事而置諸度外及于木表弟樹昌還南
盡舉契據及歷年所入歸之復爲盡心誘導撫如已子俄補
博士弟子員喜曰吾今有以慰從妹卽所以報叔父也汪紫
函表弟振鶚 先寄芸公之所自出奉母命自湖南來學飲
食教誨者三年俾得入庠以去亦與待子木同族叔母張孀
居無依拓移屋以舍之日俱食月給錢迄今三十年不廢而
且受人之惠終身不忘如 先觀察公之撫字孤弱夏紫駿
姑祖之訓迪多方以及 先太宜人初出園城甘實菴部郎
熙之夫人慨贈以裘辟亂宣城伍萃農大令慶祥之禮待假
館濠上周範亭姑祖鎔之解推皆感念之不去口不孝等耳
熟故能詳也 先考治家極肅承 先太宜人教黎明卽

起終日無情容雖炎暑不袒裼薄暮鍵戶子弟毋敢夜游者
宴會亦以二更爲率過時歸必遭譴呵與世周旋和霽中參
以嚴毅嘗語不孝等曰孟子云惻隱羞惡辭讓是非之心人
皆有之自審生平惻隱羞惡尙未全昧至辭讓一節仰事俯
育雖非泊焉寡營而一切分外之財絲毫不敢苟取惟是非
之見太明故與物多忤耳 先考學不立門戶治經好以史
事證佐之謂如是乃可貫穿古今而爲通儒尤喜談

國朝掌故遇有名臣奏議率手錄其稿至於鄉邦文獻蒐采
不遺餘力有所得輒付不孝作霖鈔存之向所輯金陵通紀
金陵通傳皆秉 先考之命而成者也 先考年七十後追
溯生平仿年譜例著有稀齡撮記一卷自是絕意世事於宅
後小圃粗爲修葺因麗春花有同心並蒂之祥築瑞花館三

楹並就高阜建亭以望蔣山偶遇春秋佳日輒偕二三老友
徜徉茶社閒凡新築名勝之區如半山亭靈谷寺後湖莫愁
湖曠觀亭大鐘亭諸處必率家人偕遊焉每日酌酒數杯不
使過量酷嗜購書插架常滿終朝手不釋卷耄年猶能燈下
作細字書嘗自題可園圖云謂予耆飲兮而量不滿一斗謂
予耽讀兮而奇不探二酉秉性迂直兮爲流俗所難容而又
不肯和光同塵兮以自改其心胷偶闢荒畦兮蒔花種竹或
藉酒以娛情兮或披書而悅目寄吾身於天地兮樂歲月之
優游聊閉門以卻軌兮於斯世焉何求可以見其志趣矣
先考晚境極順近二十年來無幾微拂意事人咸推爲福德
弟一而心常抑畏不孝作彝通籍後誨之曰爾祖宦未終達
小子以僥倖得之其善保先澤毋縱毋驕知縣不易爲也言
可園文存

猶在耳思之能不悲哉頗好茗飲不孝作彝在浙寄龍井茶歸啜之而甘笑曰此二兒之祿養也中年以後強固無疾惟耳稍重聽近歲步履漸艱不孝等昏不自覺尙以爲老人常態乃於去年六月閒突患胃痛肢冷多汗急服溫補之劑一帖而愈十月閒又發是證較前稍輕夜作晝止飲食如常日進參桂之品迨十二月十一日不孝作彝自浙因差便道省覲先考心大慰樂十四日誕辰設宴延賓竟日歡飲是夜安眠達旦私冀可由此康復奈十五日辰刻氣又喘逆俄頃卽平十六日猶策杖周行庭戶閒晚飲少許啜羹餐飯不異平時詎料三更後脅腹際忽大痛汗出不止言語蹇澀痰氣上湧醫藥罔效延至十八日丑時竟棄不孝等而長逝矣嗚呼痛哉不孝等深以未得遺訓爲恨吾母泣告曰爾父今

夏嘗從容語予吾雖死並無係念兩子皆能友順必不致貽
吾身後羞尙何囑耶不孝等至愚不肖萬難仰副斯言而
先考之愛而忘其惡爲絕可痛也 先考生於嘉慶二十三
年十二月十四日卒於光緒十八年十二月十八日歷春秋
七十有五配吾 母李宜人子二長不孝作霖光緒乙亥恩
科舉人候選教諭娶席氏繼娶趙氏次不孝作彝光緒戊子
科舉人庚寅恩科進士浙江卽用知縣娶田氏繼娶許氏女
三長適候選縣丞周國棟次適候選從九品周桂昌三適溧
水監生鄭鑑孫四詒福娶秦氏詒祿聘席氏詒壽聘何氏詒
謀孫女四長適江甯庠生龔肇新次適上元庠生孫啟椿三
適溧水庠生朱慶章四字秦世芬曾孫一貴曾今將以某年
月日耐葬 先考於太平門外前新塘 祖塋之次不孝等

知識昏瞶謹於苦由之中追敘 先考行事如右伏乞當代
大人先生賜之傳記碑銘則不孝等世世子孫感且不朽

先妣行略

嗚呼慟哉而今而後不孝等永爲無父母之人矣念不孝等
自有生以來承歡鄰下朝夕弗離曾不知人世閒有鮮民之
苦也迨壬辰冬 先考見背恨抱終天始覺少生人之趣然
賴有慈親健在藐孤猶資其庇蔭也家事猶有所稟承也喜
懼之懷交相縈繞以故不孝作霖假館於外間日必歸不孝
作彝需次武林暫緩赴省滿擬娛茲晚景愛日方長豈料釋
先考服廬及半年而復遭大故是皆不孝等侍奉無狀精
誠不足以格天也尙何言哉尙何言哉然 先妣德稱女宗
行爲家範失今不述後嗣何觀無如苦由餘生記憶荒落追

溯聞見百無一存謹條其梗概如左 先妣以姪從姑雖婦
猶女平居隨侍善體親心中邁寇氛護持 先大母崎嶇出
險其籌畫之詳支撐之苦有非可言宣者既而 先大母患
溼痺疾日卽沈綿扶掖按摩年餘弗懈適值 先考賦閒囊
空如洗木婢絞衾之具皆 先妣典鬻釵珥豫爲經營故雖
倉卒罹變附身所資絕無後來之悔以是人稱其孝 先妣
經理家政用財有制當辟地流離之際食貧茹苦不肯假貸
於人及後歲人稍裕亦從不浪費故歸里幾三十年修第宅
於燼餘築園亭於隙地舉婚嫁者九營阡葬者三無不布置
井然不露拮据之狀不知者輒疑其有私蓄其實皆 先妣
節縮日用常留有餘以備不足也每從容語諸婦曰自先姑
沒至今家法未嘗稍改爾曹將來亦能如是足矣以是人服

其儉 先妣性喜操作烹調澣濯無不躬親晚年稍諉諸子婦而以時督率之每屆秋冬之交種菘培竹必巡行園圃間卽今歲病中猶絡絲續線以自遣不使有片刻之逸也以是人仰其勤 先妣秉心平恕慈而有威待子婦極其恩勤然有過必訓導之能改卽止不復咎前時事含飴弄孫愛而不縱鄭氏女早亡所遺男女皆於外家寄養飲食教誨體恤入微於今皆能成立矣族姒張窮獨無歸相依二十餘載包容憐憫毫無閒言推之戚鄰里鄰有以緩急告者無不量力扶助卽下至僕媪亦未嘗輕相斥訶以是人樂其惠 先妣一生所遭無拂意事來嬪之初 先考猶童子試也未幾而賦青衿食廩餼卒登賢書家道漸亨隆隆日上矣六十以後尤臻順適不孝作霖領鄉薦不孝作彝捷禮闈皆 母心所最

快者卽彌留之夕猶見仲孫詒祿倖補博士弟子員以是人
豔其福 先妣年逾耄耄耳目聰明不孝等每晚隨侍輒講
稗官彈詞以消永夜或諸女孫歸甯卽共作葉子戲必至三
更而後寢迄今思之此樂何可再得哉猶憶春日介壽之辰
子婦稱觴諸孫撰杖酣嬉終日絕不見有衰憊容夏五莫愁
觀荷婆娑湖上精神矍鑠直不減壯年時此景此情宛然在
目以是人羨其健嗚呼不孝作霖今年已五十有九不孝作
彝今年亦四十矣 先妣視之猶如嬰兒飽煖飢寒時相問
訊而已身小有不適則不令不孝等知六月中偶患感冒旋
卽霍然而日漸尪羸飲食銳減不孝等晨昏省視輒強以無
恙相告不孝等昏迷無識以爲實然而豈知爲寬慰之詞耶
及至八月下旬始不能起纏綿牀蓐預知逝期遂於九月初

一日卯時棄養嗚呼慟哉而今而後不孝等永爲無父母之人矣 先妣姓李氏江甯諸生諱一鳴之孫女處士諱應庚之長女也生於嘉慶二十年三月初八日迄今光緒二十一年歷春秋八十一其子女孫曾詳 先考行略中故不贅及仲媳殉夫事略

仲媳席氏予元配室人之女姪也 先母欲續舊姻爲仲子詒祿聘之來歸已三年矣詒祿素孝謹嘗讀書爲諸生日有名而身弱善病自恐不永年嘗從容謂其婦曰我倘死子若何曰必以身殉及詒祿暴亡仲媳方歸甯聞耗痛哭語其母曰我歸必殉前已許之矣不可以食言翁姑素愛我身後一切毋令吾兄非理要索以重吾罪由是日作死計勺飲不入口家人益嚴守之比七日聽予妻之勸稍稍進食顧弄弱女

似有轉意而孰知其欲疏眾之防耶是夕將寢命伴宿老嫗取茗若有所吞者眠一炊許藥發有呻吟聲眾奔視之尙能言灌以水堅不納曰未亡人死志久定請不必救以全我之名俄頃氣絕得年二十有四時光緒二十三年三月十四日寅刻也歲終詹事府中允黃思永以其事上聞奉旨旌表如例

繼室趙孺人事略

孺人姓趙氏寶應汜水鄉人咸豐中予避亂僦居其村娶爲繼室南趙莊在汜水北本以富稱雖中落猶有紉綺習孺人來歸安於荆布奉事姑嫜三十年婉順承命遇事不敢自主待人無機械心浣滌汲爨皆以身先一嚮之甘非家人徧嘗不肯私食自奉雖薄而周恤貧戚則無吝色御下極寬值予

怒斥僕媼時輒代爲解釋甚至與予爭辯其素性然也居吾母喪以哀毀吐狂血數斗遇良醫得愈旣而連遭仲子夫婦及四女之變心傷神悴時抱疾痛而不自調攝操作如故至今秋精神困憊始事藥餌疾已不可爲矣卒於光緒二十七年八月十四日歷春秋六十有四子四詒紱詒祿詒壽詒謀紱祿皆諸生祿先卒女四天其季孫祖同紱出孫女三紱祿壽各出其一噫儉勤亦婦人常德耳何足述頃因濮青士太守慰予云女子得嫁一文人不先死卽爲無福此語奇創可以塞予悲懷予雖未敢自命爲文人感其言作繼室趙孺人事略

誄

周芝軒處士誄

維光緒六年秋八月二十四日周芝軒處士大恩捐棄賓客
烏序哀哉耆舊凋零音徽喪失日沈沈其無色風蕭蕭以悲
鳴王祥之萑依然本根盤固田氏之荆具在枝葉扶疏古道
照人懿行書於惇史遺容在壁典型猶見老成乃以日月之
有期將就燧堦而從事碑空郭泰謚缺展禽諸子辟踊以長
號戚卹吞聲而飲泣淵明不作誰爲蒿里之挽歌潘岳自慚
且製汧城之哀誄詞曰

自世之衰孝義道缺六行賓興鄉師不設豈無通儒自矜賢
哲任卹睦嫺視爲小節猗與周君主敬存誠小心翼翼見重
老成寡言鮮笑根於性情抑然自下在醜無爭少事父母服
勤不苟椿庭疾危羣醫束手割股和羹焚香祈壽目睫不交
爲期卅九伯兄聚處吹簫吹壎遺產所入按歲中分君謂昆

弟肥瘠宜均辭多受少實爲兄貧交友一心始終無間取予必嚴毋然歆羨膺聘當途事至立辦府主情深久而不變族多窶乏贈之以貲謂是先人一脈所遺富而後施將待何時親如子弟多不及知人或有過隱之無暴偶聞蜚言正色相勗時手一編先儒語錄藉養心田惟日不足立心敦竺宜享長年如何甫艾須髮斑然持已接物必冀萬全慮事詳慎精神耗焉季子彬彬慘矣無祿貞婦來歸守身如玉強作達觀以慰親屬黯然神傷沈疴遂伏夏秋疾作神明不衰謂人在世生寄死歸屬續易贊豫知其期君子曰終庶克當之霖以顯愚獲交令嗣景仰高風沖和純粹鄙寬薄敦足矯末世敬撰燕詞素旗以識

甘劍侯大令誄

維光緒二十三年春三月二十七日同知銜候選知縣前蕭
縣訓導甘劍侯先生元煥捐棄賓客歷春秋五十有九嗚呼
苔蘚門閉感舊雨之不來匏瓜庭空驚晨星之併落霖時方
抱東門吳之感愈增子桑戶之悲彈指刹那悟浮生之易盡
兼旬小別竟重覲之無期構思則心緒悵焚怪鬼伯兮肆虐
執筆則文詞荒落招楚魂兮不靈輟不復作哀可知已越至
孟冬其嗣子曾沂將卜葬於黎莊之原丹旌載揚素車已駕
復廬宛在不聞訾歎之聲遺挂儼然追憶平生之雅凡夫顏
閔之孝德原嘗之義聲許鄭之注箋趙歐之金石久經傳播
奚俟敷陳惟霖與先生心跡素孚襟懷尤洽紀羣兩世折輩
行以下交籍湜同門藉文章爲作合此情此景耿耿不忘嗚
呼謝年雞厄丁表鶴栖老成謝而典型曠善人亡而邦國瘁
可園文存

證三山之舊籍定歸兜率洞天載一束之生芻且效南州高士懼貽腹痛之悔聊助執紼之謳其詞曰

猗嗟甘君敬侯之裔孝友相承澤流數世敬治梓桑秀徵蘭桂況屬通家情誼尤摯癸丑之歲白門遭災廣廈大啟蔣碧

山隈予時辛苦從賊中來踵門求庇襁褓芒屨願賢老人

父自號

憐予幼慧呼小秀才莊言亦戲命君與交以學相厲君

甫成童見若夙契十二年後言歸里門講院請業臨川

李小明廷

尉桑根

薛慰農觀察

致知齋課同師梅村

江梅翁先生

翹材館客同謁

薇垣

李爾亭方伯

大府愛才聲名蔚起鶚薦秋霄馬馳

帝里玉螭金螯梅街珠市意氣干雲光陰逝水舊時年少倏焉老蒼須眉圖畫詩酒徜徉倡予和女一詠一觴消寒挑菜盛會難忘六代故都人物淵藪自歷兵戈消歸無有志局互

蒐古人尙友考獻徵文爲謀不朽甘棠築塾訓集孤童試文
課賦程法不同其持衡鑒秋水洗瞳第其甲乙俾識所從前
賢遺篇珍如金玉金陵文鈔建康實錄皆付棗梨工勤削築
惜未觀成君逝何速自君喪母常居墓廬清明敷土感疾迴
車君素善病猶謂無虞未及省視弔者在閭嗚呼天道無知
喪我明哲邦之典型何可再得落月屋梁依稀顏色遐想音
塵安能默默明知人壽從無百年那堪故舊其亡忽焉霖雨
裹飯海山輟絃欲誌予痛成此誄篇

張太夫人誄

維光緒二十三年十二月二十一日誥封一品夫人張母后
太夫人疾終金陵之寓舍烏虜哀哉霖惟甘泉圖象賢母表
其儀刑彤管揚芬女史修其職事自來壺範類詔來茲而況
可闡文存

繼室之稱魯尊聲子徽音之嗣周媚太姜事必躬親先鳴雞
而理務情無偏向坐銀鹿而弄兒上以率畫一之規下以廣
則百之愛琴絃無改栢澤常留韓氏和熊膽之丸母教肅勵
王郎啖牛心之炙子名以成風咏宜家雅歌昌後太夫人其
兼之矣天祿不永婺星掩輝遺挂在堂拜瞻致敬漫侈瀧岡
表墓素交歐氏之孤聊從列傳徵名敢繼蔚宗之後謹作誄
曰

聖清中葉緯武經文江淮閒氣竺生虎臣慶鍾諸子簪笏盈
門起居八座畢惟太夫人其有女賢明后蒼之裔姆教夙嫻
抗希古誼列女圖成瑤明羽翠張之壁閒左眄右睨其并纓
有屬來嬪于張瑀璜節步翬翟生光織縑代素毋炫已長壹
以前人爲法守成規不忘其藐焉遺孤無母有母食分餘甘

衣除積垢夜漏傳三算章授九愛能勿勞賢哉新婦其建威

奉母解組家居治城山下躬奉板輿中饋有助容婉色愉扶

持搔抑善事威姑其勤儉治家苦心調劑薪米稱量衣裳補

綴畫課女紅宵煩簿計終歲辛劬有過人之才智其六坤厚育

物善於拊循恩周族戚澤遍里鄰錢傾赤仄粟散紅陳施而

不德太夫人之仁其七內御婢奚外治僕從鑒察不遺權衡互

用猛以濟寬億則屢中督內外以習勞毋或敢弛縱其入母氏

聖善有子七人異生同育厚薄何分以養以教玉友金昆鴈

鳩之德專壹平均其九兄弟隨肩出就外傳七業並興四科分

布政事文章各勤所務際會風雲母顧之而燕譽其十諸女繞

鄰娉娉畢彝班箴曹誡嚴不傷慈烹飪組紉婦職無違壻皆

玉潤足耀門楣其十一母質素羸平居善病逮喪君姑毀幾滅

可罰文字

性復失所天淚血交迸憫季子之所遭惟強勛以安命其十
自時厥後疾乃愈深節逾長至一陽幸臨既復仍剝迺徹瑟
琴雞斯辟踊哀哀子心其十霖也不文忝年家子夙仰母儀
郝鍾媿美祁祁僮僮我聞如是頌閭宮之首章請從隗始其
四

周柳潭署正誄

維光緒二十五年春二月二十四日四品封典光祿寺署正
周君柳潭疾終里第烏乎旭日掩輝文星失曜風卷漫空之
霧海揚不靜之波楚國龔生天年竟天魯邦展季私謚誰加
猶憶庚辰之秋君父芝軒先生捐館霖以後進曾作誄文倏
歷廿年又爲弔客嗚乎紀羣兩世規範猶存颺眇諸昆風流
未歇昌黎之哀馬監自歎吾衰孟德之誓橋元惟愁腹痛敢

述平生之懿行藉申雅故之私忱詞曰

烏乎濁世泯泯莽莽趨時之輩人云亦云如夢不寤如醉常
醺岸然自異惟我周君周君之軀魁梧奇卓周君之心光明
磊落孝友于家力懲澆薄篤信于朋不輕然諾我與訂交垂
三十年梓橋俯仰棣萼周旋講帳遞設局書同編相知最悉
製爲誄篇烏乎世人罔識倫紀秦俗富分伊川野祭薄其所
厚行同夷裔君獨順親先意承志居喪倚廬不宿于內足蘭
荒郊牛眠卜地生養沒葬始終一致烏乎世人刻意工文體
格破壞牛鬼蛇神天吳紫鳳顛倒不倫君獨守舊雅正清真
道宗洙泗注尋洛閩諸子悉屏先型是遵雖困場屋自慎傳
薪烏乎世人名爭襲取糾合好事創爲義舉鄉里善人羣相
推許君獨闇修不矜建樹堂恤孤嫠穀儲倉庾上計給資乘

書稽古無役不從如桴應鼓烏乎世人附會泰西商務非務
相率爲欺舉國若狂競謀集貲君獨持正不爲利迷煤屏寶
藏車斥東夷委心任運無意居奇庸中佼佼厯見於斯烏乎
周君實秉卓見磊塊自憐驚霆不眩時事日非生亦何戀君
子曰終合於經傳獨念賤子相與往來今歲尤密耦俱無猜
掃葉煮茗消寒銜杯曾幾何日蕩爲烟埃寢門之哭云胡不
哀況當祖奠執紼有期伊人不見墜懼莫追書旗志慟靈其
鑒之

秦伯虞司馬誄

君諱際唐字伯虞姓秦氏上元人少孤力學咸豐癸丑之歲
粵賊陷金陵母夫人何氏殉節君亦投水從之遇救得不死
閒關辟地備書於吳楚間江南平返里應試以縣學生食廩

餽補行辛酉選拔充貢國學旋領同治丁卯鄉薦文名藉甚
六上禮闈報罷遂不出就職知縣加同知銜主講奎光鳳池
兩書院里中後進多著弟子籍庚子以後改立校舍君迭充
傳習所總教員初級師範學堂教務長鄉望愈重光緒三十
四年夏四月二十八日卒於里第歷春秋七十有二烏乎哀
哉君清才雋上行誼甚高鄭康成之授徒身通六藝邵堯夫
之思治眼見四朝運厄龍蛇識占鵬鳥典型已矣文采泯焉
此邦國所以傷殄瘁也作霖以紀羣之世好申獻穆之重姻
夙契襟期久覩素蘊林宗太學忝與齊名叔夜廣陵俄成絕
調感二鳥之翼折閱一襲之道孤爰託素旗製爲斯誄曰
猗君早慧託業儒門中遭離亂蔭失慈護伶仃孤苦筆墨隨
身精心所撰發爲高文江左寇平從事場屋入又溫岐萬選

張鷟豈料運窮修門難入汾河暴顙荆山別足春風琯操長
嘯歸來燕臺金盡瀛海鏡開舟車況瘁維予與偕從茲息影
無閒形骸廬洞披雲程門立雪技了十人君才超絕予實鈍
根靈泉易竭上水行船僅能理楫救生濟渡恤糈分錢興利
祛弊君握其權鄉里稱善似馬文淵欵段下澤予幸從焉潛
德幽光惟鄉先輩詩古文詞積久易晦板鏤棗梨體芟蕪穢
腕脫目眇君校予對臯比講易宵雅肄詩生徒麋集儼然稱
師君方重席予亦請祠後先競爽斬與驂隨綜兩人之締交
今倏經歷夫卅載聯臭味於芝蘭兮復葑菲之下采任意見
之偶乖兮終常度之不改伯牙彈琴而鍾聽兮西門柔韋而
董佩當春秋之佳日兮會五老而留圖顧婆娑之白髮兮聚
南岡之精廬借詩酒以遣興兮作生日於白蘇忽隨風以四

散兮惜蹤跡之遽疏緬夫子之暮年兮每多憂以致痗感家
運之屯邅兮病屢瀕於危殆況時局之日非兮桑田將變而
爲海願一瞑而不視兮甯九死其無悔嘗顧予而太息兮欲
生聞夫挽歌雖豫凶之非禮兮實作達之意多獻九言而蒙
許可兮曾擊節以吟哦謂大化之終盡兮亦尙寐其無叱應
五福之考終兮齊慶弔爲一科諒靈爽之不昧兮乘雲車風
馬而來過笑後死者之留塵世兮其如無益斯文何

哀辭

仲子詒祿哀辭

嗚呼詒祿爾真死耶自爾之生迄今二十有二年爾之瀕於
死者屢矣初落蓐凍僵而復蘇十齡以後病頭痛病腹痛病
咯血病勞嗽者四病牙衄者三是皆必死胡必死之病皆不

死而竟死於非病耶卽爾心小有怫鬱亦何至於是耶以吾家數傳孝友人所深信不宜天降此奇災也以爾之居心和厚識見明達學業深通亦不宜躬罹此至慘也其夢耶其非真耶豈予之薄德不克以庇爾耶豈予之近獲罪愆而天特以爾示罰耶抑家運之衰而爾適丁此厄耶抑爾之數已盡而邪祟乃乘其隙耶不然何忽至於是也爾一瞑而不復顧予百思而不得其故執筆寫哀淚如泉注辭曰

嗟嗟蘭蕙當春而枯畢命之夕爾容睟如課弟讀餘改削詩牘句酌字斟毫揮珠玉時夜已靜春寒峭然予未見爾慮爾假眠步入爾室爾趨侍焉燈光熒熒筆硯在案言笑如常方寸不亂予甫歸寢忽聞弟呼穗孫有故殘酒半壺驚起求醫猝不能救命輕鴻毛事莫可究哀哉詒祿爾太無知上拋父

母下棄髮覩忍心不問視死如歸有何大恨志決如斯思爾
平時追隨予側焚香捲簾拂箋吮墨靜歛山光可圖月色扶
爾偕看履迹未蝕觸日生悲焉能不憶嗟嗟造物云胡不仁
六年之內奪我雙親服未及終又天愛子人非金石誰能堪
此吾神已亡祇形未死哀哉詒祿魂其歸休爾以一死貽父
母愛爾如有覺其亦悔不

可園文存卷十三目錄

頌

平江南頌

表

恭擬

慈禧皇太后七十萬壽賀表

七

七誘

連珠

演連珠

牘

公舉程綿莊先生鄉賢牘

已閱又存

分卷十三目錄

公舉秦文懋公鄉賢牘

可園文存卷十三

江甯陳作霖伯雨

頌

平江南頌

并序

蓋聞地盡九區揚域控東南之要天垂五緯勾陳總征伐之
權故克敵以命將爲先殺賊以擒王爲本在昔周宣奮起方
召奏勲光武中興鄧馮夾輔唐平安肇收京誦郭令之功宋
討楊么渡湖紀鄂王之績類皆摧枯拉朽掃穴搗巢滅小醜
之跳梁蕨大猷以告廟從未有殲十二年之逋寇玉壘銷兵
復數千里之巖疆金甌補缺如今日之盛者也欽惟我
國家承天之休續明之緒以武戡禍亂以文保治平

聖主

賢君經六七作

深仁厚澤垂二百年久已

化洽堯天

恩周禹甸兆姓安田廬之舊三邊無烽燧之驚惟是網罟太
寬吞舟魚漏禾苗正茂食葉螟藏則有洪秀泉等倡亂粵西
浸延楚皖如蠶薦食似蠧分屯沙蟲化於連營風鶴傳其警
報方舟連艦龐勛自湘水而來固壘深溝陳敏據建康之郡
蓋至江南淪陷而巨寇之勢愈張矣今夫江南也者界連吳
越星應斗牛城郭周遭山川控帶作六朝之都會陪勝國之
京師論地勢固在所必爭豈羣盜而容其久踞所以胥蒲命
發細柳軍移欲揚虎旅之威先復龍蟠之境其奈蜀中向寵
作督未見成功睢水張巡力戰終於殉節海飛山走半壁難

支轍亂旗傾全軍皆墨此實運遭元二相傳紅羊換劫之年而月報捷三終望白馬東來之眾也

文宗顯皇帝垂裳北極軫念南邦宵旰求賢簡書命將爰以曾國藩爲

欽差大臣總督兩江進協辦大學士衛青出塞實總諸道之兵裴度視師輒晉相臣之秩始則遵養時晦以柔克剛繼則激厲將才轉敗爲勝乘閒伺隙太公書著陰符決策出奇杜預胸羅武庫開幕府於皖公山上坐鎮一方遶元戎於全楚軍中啟行十乘若浙江巡撫曾國荃者臣國藩之介弟也因奏請爲江南總統焉祁奚爲國舉不辟親吳玠禦戎權先界弟加柱天部領曳落河三覆設奇孤軍轉戰六郡良家之子千金超距之徒喧鳴則山谷應聲叱咤則九泥失險跼焉夜

墮文淵冒暑瘴之鄉懸馬朝登士載入陰平之境壘堅若石
薄肉之路雖窮槍轟如雷絕頂之峯竟上蓋自雨花臺寨燬
而賊始大挫爾於是相度機宜籌維形勢知金陵之險首在
長江而洲渚之衝實惟九汭長槍大戟乘勝飛馳陸騎水舟
分途並進鮑老旂豎楊僕船來藉水勢之汪洋逞火攻之猛
烈彼方憑其門戶我已隳其腹心赤壁燒兵周郎功遂白衣
作估呂蒙計成其事難其勳偉已由是長江之要皆爲我有
賊所恃以抗拒者獨鍾山之巔耳爾乃一鼓作氣萬馬騰空
日矢石而競登易如反掌望城郭而可辨朗若列眉破竹無
頓刃之勞聚米有成山之勢旌旗獵獵九天九地之兵帷幕
沈沈七縱七禽之算劉琦借電光以破敵狄青乘月夜以奪
關將見峯據紫金將軍自天而下柝臨朱雀么麼無地可逃

矣斯時也幕危燕散鼎沸魚驚鼯鼠之技無多天狗之星竟隕半年枵腹維少雀飛萬里求援信占鳶斷策孫盧之兵勢南國途窮聞韓范之軍聲西人膽落然而羊從藩觸知必及於

天誅免喜窟深猶自恃其城險豎子僭立羆生僞相遠來狼與狙比三方圍合百道梯攻將士之志雖堅客主之形迥異公輸爲機以固守九設九攻堇父援布以先登再懸再斷幾幾乎智能已索勇銳莫施

皇上披覽輿圖獨操

廟算恐軍心之漸弛致寇勢之復然羽檄紛馳疊下五申之令指揮若素親傳六甲之符臣國藩等久歷戎行仰遵

嚴旨合五諸侯之眾陣比星聯麾九節度之師圍成月暈借可圍文存

留侯之匕箸帷幄運籌納光弼之韓刀沙場決戰夷庚路塞
掘子軍來城下積薪地中開隧箭逾星駛時飛魯仲之書汗
似雨多不揮宏淵之扇遂以同治三年六月十六日攻克金
陵拔天矯之螯弧入深沈之虎穴牙城直上攀堞若飛狹巷
相遭殺人如草罪人斯得脇從罔治戮崔子之尸市人皆識
傳新莽之首海內騰歡露布上聞千里馳其吉語星輅入奏
七朝達於長安巨憝蕩平大功底定掃盡欃槍之象重依日
月之光此皆由我

皇上稟

列聖之成規奉

兩宮之懿訓垂簾高后有堯舜之稱輔政周公成文武之德
朝中政肅閭外任專故能迅奏膚功成茲丕績猶復念蠶臣

之謀畫憫士卒之勤劬釐贖酬庸圖形誌寵分茅胙土加五
等之封列棘班槐晉三公之位放牛歸馬共圖休息之方舞
獻儀風迭見嘉祥之集豈不盛哉小臣籍居建業目覩滄桑
慶寰宇之昇平喜家山之收復七八口江淮蓬轉幸得生還
億萬載德澤綿長從茲再造感深淪浹語罄掄揚雖技愧蟲
雕難附清廟生民之什而聲宣驚奏總屬食毛踐土之忱謹
拜手稽首而獻頌曰

瞻彼衡山秀鬱奇古篤生異人佑我

聖主難弟難兄允文允武大功告成爲國之輔

其蠶茲小醜

據有南畿十年不克挫我兵威向張繼沒

皇帝曰咨相臣國藩汝往視師

其猗

與曾侯開府皖上任賢

使能雖親不讓有弟國荃智仁勇壯假以便宜伊誰敢抗

其三

雨花山壘九洑水師敵所犄角我則奪之鍾山外郭長江深
池敵所憑恃我則得之其賊膽已寒眾心自渙糧食內絕援
兵外斷金魚難逃檻獸莫竄甬道築成獨操勝算其堅城屹
立高不可梯瓜期屢及蔓草猶滋士卒暴露告功不時維

皇赫怒

嚴旨交馳

其

臣藩臣荃喬揚威武督師仰攻不避炎暑天上

樹旗地中鳴鼓將士桓桓如熊如虎

其

六月旣望遂克名都

穴洞關鼠搜山獲狐渠魁就縛老弱罔誅宣揚

德意發粟頒儲

其

皇帝曰咨嘉爾曾氏兄弟同心轉亂爲理錫以世封彤弓茲
矢匪予爾私以諷臣子

其

江南旣定四海來同昆蟲草木咸

仰

皇風伊誰之力將相公忠知人善任

天子之功

其

表

恭擬

慈禧皇太后七十萬壽賀表

臣聞金泥披檢升岱崇以告元功玉輦展輪聞嵩高之呼萬
歲是以門崇堯母霽月生輝石鍊媧皇補天無迹闕翔雙鳳
仰泰宇其穆清駕轉六龍行坤輿以廣遠然而湛恩鴻沛侈
漢家封禪之書靈祉蟬聯考隋代樂章之志多非紀實未足
延洪若夫德媿姜任位高馬鄧嗣无疆之服撫有截之區延
世澤而累洽重熙上安九廟集大勳而高掌遠矚奄有八荒
著聖善之稱嗣徽音之美夔乎尙已欽維我

慈禧皇太后璇宮安御珠冕受朝勞心於咸池浴日之初敷
治於薄海從風之後居中御外福壽隆貴者逾四十春食德
飲和廣輪周迴者幾七萬里紹

十朝之寶祚享大耋年洽億兆之歡心爲

天子母尊居長樂東朝修問視之儀

天賜修齡南極應昌明之兆九五福曰壽衍疇用敘夫彝倫
七十古來稀琢璽親承夫

家法蓋有輔相裁成之誼博厚悠遠之徵焉溯自周成焉几
託元子以濟艱難宋后垂簾召碩輔以咨故實京邑正萬年
之統日月雙懸罪宗行兩觀之誅風雷一掃弼儀分出授斧
鉞以專征角寶皆燭欣干戈之大定吳楚燕齊之地盡散蠶
屯滇黔蜀隴之邊都無鶴警露零雨潤羣欽母養之恩雲爛

星輝共頌

中興之瑞況復績彰撻伐道洽懷柔通互市以來遠人聯同盟以交鄰國天狼射弧矢閭閻免鋒鏑之災海蜃化樓臺闢閭騰金銀之氣王會之圖萬國鵜翼蜚肩賓門之譯九重鵠音馱舌有容德乃大不徵荆楚菁茅多難邦以興敢忘蕪蕢豆粥蓋惟女中堯舜負斧展以合符因之化外蠻夷咸梯航而納費也由是宵衣求治日昃忘飭當春王頒朔之初正冬狩

迴鑾之會禮失而求諸野中國之學在四夷善同則取於人至聖之智師萬物興利除弊條例司實總其成親仁善鄰通問使必隆其選唐政府兵之制用蕃將以指麾宋沿太學之規試諸生以論策考工作記藉鉤稽得其精微平準成書與

貨殖相爲表裏術能縮地氣運車而輪運舟巧竟奪天語從風而信從電凡此文武弛張之道悉本

宮闈經畫之心我

皇上遵奉義方稟承桀訓闡一人之大孝爲臣庶先羅四海之奇珍以天下養茲者紫穹錫羨玉燭調元屬先甲以延釐際嘉辰而篤祐衍龐鴻於億禩普翼燕於九埏祀岳瀆之神祇禮更嚴於闕里晉簪紳之爵秩寵並及於爾親科舉之額以增預開蕊榜蠲貸之恩大沛屢奉綸音賚粟帛於耄耆觀王化而扶鳩杖釋繫囚於岸獄播大赦而植雞竿猶復盛德不居精勤無倦宗魯頌無邪之旨誨爾諄諄守周書勝怠之箴小心翼翼以儉爲寶卻牧臣之獻金珠惟謙乃光辭徽號之加玉冊此固歲逢龍集嘉祥早應夫長春樂奏鳳鳴和氣

先凝於元旦者矣臣等優游壽寓歌詠清時企聞闔於九天
荷帡幪於

兩聖彤雲徧覆華鬋耀佛誕之光愛日方長弗翟篤仙源之
慶上軒后長生之錄橫日臚歡誦鎬京豈樂之詩

慈顏增喜極

深宮之頤養綿算數於曰億曰祗曰京曰垓攄率土之惻忱
效鼓舞於自西自東自南自北

七

七誘

嘉遜先生年及知非性耽守寂鸞翮鍛而歸栖駒志衰而伏
櫪感時局之遷流熟人情之閱歷許遺世而懸瓢陶惜陰而
運甓息南郭之塵機展北山之良覲松雲送其清陰蕉雨聽

可翫文字

卷十三

七

其殘滴自足嘯歌兩忘欣戚於是鳴豫公子憫其固窮命車
造訪躡屐相從如子貢之過原憲似劉表之尋德公肯以貴
而下賤欲易介而爲通乃辟席請於先生曰蓋聞道與時移
術因人重趣不博則如蠶自以繭纏識不廣則見駝而疑馬
腫今吾子澹然寡欲默爾忘情一斑之窺何太略六合之外
無所營心雖以木石自處耳將聞雷霆而驚是以天地爲桎
桔并忘機械之牙萌也今將示予以四極之大萬物之宏海
客高談而非詭工倕創見而難名亦願聞乎先生曰賤子顓
愚兢兢自守幸荷矜憐敬爲虛受

公子曰洋綿織綢蠻笥卷布椒底紛呈檳紋回互蜀錦遜其
華齊紈失其素耀五色之鮮中一身之度佛絨近體而逾溫
鬼扣縛襟而自固短長之帶隨人逼仄之禪注跼手衣則慙

囊以成目鏡則飲品以護加以佩珍相競雅玩可觀貴同文
貝種類本難日本之寶刀霜潔呂宋之燒玉冰寒表匣則金
鍼度響香囊則蘇合凝丸此亦衣飾之至奢也子能從我而
服之乎先生曰楚楚蜉蝣朝生暮死神瘁貌華君子所恥
公子曰倫敦西土印度南天鴉鋤布種罌粟成田切泥塗以
作塊鍊脂肪以凝煙覆朮之名並貴芝蘭之味莫先爾乃綺
榻高張華鎧明照盤捧玉而多珍竹截簫而通竅蜨夢不成
蠶眠宛肖貫丹田則吸氣有聲談密語則聯牀共笑其上者
爲錦雲之洞色界之天撫憑素手臥並香肩大土之膏腴最
膩東洋之妝束逾妍馥郁則熏同侍女橫陳則媚過小憐此
亦嗜好之至蕩也子能從我而樂之乎先生曰鳩羽流毒狐
蠁宜淫去之若浼何足撓心

公子曰局戲之風閩粵爲盛會數百花閭猜眾姓與射覆而
並傳非投瓊所能競富商不吝其貲豪民實司其柄至若烏
蠻國小自鴿票新英文紀其數華券遜其珍風行薄海月報
通津取三三之孤注償萬萬之番銀俄焉霞麗彩高電傳信
連捷同露布之來喜應燈花之下富可以敵陶朱寒不必憐
范叔藉極狹以獲香類豚蹄之操祝此亦利藪之至鉅也子
能從我而射之乎先生曰破產傾家實自賭始一擲多金可
止則止

公子曰蓋嘗采風貨卑覽勝夷場見夫累錢之戶及肩之牆
曲室周遭以四達層樓矗立乎中央升梯歷級通步連廊墜
塗牡蠣瓦覆文鸞植以精銅之柱架以鐵木之梁窗百葉而
閣開如意鏡圓照而顧盼生光其外則編棘爲籬鋪沙成路

葉翦綠齊花攢紅露蝸紋護其碎苔鱗甲森其短樹涼鬱鬱而暑清陰叢叢而雲沍此亦居室之至潔也子能從我而安之乎先生曰鵲鵲巢林一枝已足華屋連雲非予所欲

公子曰方今四海昇平外洋桀驚仰謀國之多臧豫治兵以防暴當其廣野揚旌中軍樹纛循禹步以止齊效夷言而鼓譟燃萊菔之鎗發格林之礮則見火機螢度綫路螺旋氣憑電達聲若霆顛子開花而盡碎札徹葉而皆穿推之蚊艇相銜魚雷競響龍旆飛揚鯨波震盪攬白浪以如翻騰紫煙而直上攻堅之利誰齊破陣之功無兩此亦武備之至精也子能從我而觀之乎先生曰逢蒙學羿盡道綦難況殘生命不忍卒看

公子曰四大部洲一圓球象測向背以定陰陽算道里不可

尋丈若乃浮舟以達鼓輪若飛煙青青以裊影器振振以發
機馬奔難及龍矯依稀於是經太平之洋歷地中之海聞見
逾開瑰奇足采英吉利之路略通德意志之疆未改鄂羅斯
邊壤相連米利堅古風斯在其餘若土耳其耳班牙葡萄牙有
噠有瑞曰布曰巴小如著鑿錯似插花莫不窮其都會遊以
鐵車伯駑之經無其詭張騫之行無其賒此亦域外之至遠
也子能從我而探之乎先生意有所動良久乃言曰似此壯
觀僕素所願奈今倦遊卑毋高論

公子曰唐碑法楷宋版祕書貴如圭璧珍比璠璣欲鉤勒則
神迷罔象欲傳刻則字誤魯魚爰有格物之徒創奇之士卷
積成山石平於砥鏡光攝其真形金液淬其止水較鐫木以
尤工與照容而酷似幻一成千縮尺爲咫波折不改其初印

摹難如其駛獲原溺於陵谷之餘混舊本於巾箱之裏玉枕
不必寶蘭亭瓠盧不必藏漢史眼非洗而亦明心雖貪而何
恥矧乃可園半畝有館有亭清晨讀帖午夜溫經常流連於
篇籍借疏瀹其性靈雖百城之森列非先正而誰型此亦古
本之至雅也予能從我而購之乎先生於是喜形於色奮袂
以興曰卷軸紛羅既多且有尙友古人請隨子後

連珠

演連珠

十首

蓋聞欽鴟之鳥冒鳳皇而不疑鷹隼之禽遭鵠梟而見忌是
以深源不出有三公交辟之書夏竦持權作一網打盡之計
蓋聞粟盈貫朽蘊利者易啟其爭玉玷龜殘典守者難辭其
過是以高明鬼瞰之語揚著解嘲監臨自盜之條漢嚴考課

蓋聞明聖所難端在知人之哲樞機不慎必招失言之愆是

以在朝孔融既誤薦夫孤鶚居鄉劉勝甘自比於寒蟬

蓋聞惡草之根不去逢春卽生滋蔓之勢已成當路難刷是以元祐君子失計於調停太和黨人快心於報復

蓋聞驕矜之態成於諂諛深險之機發於翕歛是以趙師韜之爲犬指喉因人李義府之名貓陰柔害物

蓋聞進難退易君子審幾利盡交疏小人奚恃是以德誠遠勢自號鍾山之公安石罷歸梅用福建之子

蓋聞驚馬戀棧貪饕愈深羝羊觸藩退遂難決是以歐公責若訥不知羞恥何存高拱逐徐階反與權奸同列

蓋聞膏肓之疾非庸醫所能治闔閭之場有百戲之咸在是以藥餌草木酷烈勝於丹砂市集胡孫播弄比於傀儡

蓋聞度支耗費競存染指之心尤散閒身必圖養安之地是以船修鵠首劉晏不惜重貲居造龜頭李璟原無大志蓋聞老驥退休要駕之名不受神羊奮迅指佞之性常存是以郭令在告多期防楊炎之代署延齡沒財入已賴陸贄之敢言

牘

公舉程綿莊先生鄉賢牘

爲典型具在輿論僉同公籲移詳題請從祀鄉賢以光盛典而勵人心事竊惟立德立言爲善者必獲報激頑激懦聞風者莫不興是以希文修嚴子之祠梁公留泰伯之廟類皆曠世相感成秩無文而況近接見聞生同里開示士類觀摩之助沒世不忘符

朝廷敦勸之條有功則祀苟模範足資於桑梓斯春秋宜薦以馨香伏見故上元縣學生舉博學鴻詞及經明行修科程廷祚伊川華胄古歛高門祇緣先世之薄游遂向建康而占籍鄉閭著譽庠序蜚聲經師人師署頭銜而無媿古事今事叩腹笥而不窮公卿下折節之交薦牘兩登於

丹陛春夏尋讀書之樂釣游常傍夫青溪徐穉清高本是南州徵士賀循該洽洵爲當代儒宗矣溯自髫年養志長子克家仲由承啜菽之歡禽父識觀橋之敬茝蘭作佩漫云童子無知黍飯可供常侍丈人肅客當服勤於左右以少儀內則爲歸迨哀慕於終身有述德誄功之筆而且難兄難弟相友相師誼篤壘簾學分經史鄧氏一門之內術業竝興蘇家二妙之才聲名競爽其孝友有如此者當其崢嶸頭角涉獵篇

章秉資既異於常童出語早驚其長老李白則文成倚馬稱
名無愧謫仙揚雄雖技擅雕蟲既壯悔其少作遂乃覃思經
籍抗志聖賢以博約爲進修以克治爲格致通漢儒之訓故
而去其支離探宋學之精微而化其固陋由是箴育起廢鄭
康成自具權衡璞玉渾金程明道羣欽風度其學識有如此
者然而儒術迂疏慮不切於實用清談高遠豈能赴夫事機
必經濟乃爲文章知俊傑宜識時務於是研精禮樂考究兵
刑農譜桑經廣齊民之要術河渠食貨通太史之遺編三獻
六佾之文從闕里講其未備十哲四科之配就漢代議其當
增況復力闢異端留心掌故昌黎學正探古人道德之原陳
壽才淹作益州耆舊之傳其抱負有如此者若夫性成狷潔
品勵剛方取與必嚴步趨尤謹當薦牘名登之日正長安譽

滿之時松筠之直幹凌霄桃李之新陰擇地龍門雖近不求
元禮之掄揚虎榜宏開甘受孫山之屏落由是清貧自矢晚
節彌嚴峻高士之丰裁爲後生之楷式桓榮老去四方之羔
鴈盈庭元亮歸來三徑之菊松寄傲其行誼有如此者至於
見義必爲當仁不讓不以阨窮而自阻不以造次而或忘悼
逆旅之死亡驂曾脫賻紀卑田之始末鴻兔哀嗷甚且濟友
之危忘已之累患難之交旣固文字之旤乃消複壁難藏寶
石方引爲深愧囊餽是納甯俞久相與周旋其任卹有如此
者若乃經術湛深文詞溫厚胸羅萬卷日試千言頭白著書
歷雪案螢窗之瘁汗青成帙備金匱石室之藏是皆宜服賈
之精運韓歐之筆故能獨標真諦刊落浮華他若記載小文
詩辭雜撰不過視爲末技聊以陶寫性情其著述有如此者

凡所臚陳皆堪欽挹似此純修之粹美可振澆風宜邀

聖代之旌揚用彰遺行爲此繕呈事實加粘切結公叩俯賜

移詳題請入祀鄉賢祠俾得荷

俞旨於絲綸肅明禋於庠序將見規行矩步作多士之表坊

築幣焚椒永來茲之祀典

公請奏文懇入祀鄉賢牘首段同前牘不錄

伏見故贈禮部尙書前翰林院侍講學士謚文愨秦承業淮

水鍾靈蔣山擢秀蓬萊絕頂清承老鳳之聲冀土空羣譽擅

神駒之目當丁年之就傅業紹青箱遂甲榜之掇科名登黃

紙拜

殊榮於釋褐傳佳話於登瀛東觀讀書西河校士才返并州

之簞節旋窺太學之石經保直

南齋進膳宮秩

帝眷甘盤之舊學仍侍

書帷臣師永叔之歸田懼貽官謗迨飾終之禮渥復

賜祭之恩隆春官晉宗伯之銜神道重

奎文之麗典彰諡法

賚及後昆爲

天子師允稱江南大老志聖人學無慚史傳儒林矣溯自子
舍承歡寢門養志率夏清冬溫之節循出告反面之文撫仕
偶登旣懷鯉庭之訓閒身暫乞爰申烏哺之情及骨立以居
喪復心虔於追遠卜高堂之窀穸景純則相地有經詎先世
之艱貞令伯則陳情上表如斯達孝可謂難能由是移以作
忠施於有政任隆保傅早諭教之多方位列侍臣復靖共之

固懈徵申公以備顧問蹇已勵於匪躬知汲黯不免釐愚言
何嫌於逆耳敷陳造郗味鹽思崔浩之辭慷慨批鱗賜箚表
廣平之直固

天恩之寬大亦臣志之感通至於志在急公情殷濟眾當無
年之屢告與當事以豫籌市竟鮮藏米價歎江東之貴義無
獨飽草堂捨城北之居勸分子敬之困誰敢擁貲以自奉親
執黔敖之粥何妨蒙袂而來前轉輸往返有常期比秦伯汎
舟之役醫藥葬埋無坐視遵富公救患之規宏推解於蒸黎
篤敬恭於桑梓民皆懷德口不言功而且義重睦婣財羞慳
鄙拯孤危之女子花落飄茵恤貧乏之衰宗竈寒舉火自見
仁恩之被非同任俠之爲若夫山立修容冰清勵志肅秋霜
之操凜暮夜之知受恐傷廉辭薛邦之金餽施休責報任陸

氏之莊荒卽至晝接

龍光親承

燕笑將有非常之用定邀不次之遷而德本撝謙情甘棲隱
尉元在學雖崇三老之尊李泌登朝終抱九仙之骨企良謨
於伊管學而後臣作

盛世之巢由身何妨退況復鑒衡不爽評隲無私躬抱冰壺
目激水鏡馳轡軒於晉翼一路星明勤教授於蘇湖兩齋雨
潤相攸得士於寒微亦繫紅絲爲

國薦賢雖材武皆邀青眼良由檢身不及出言有章通經史
之真詮窺聖賢之祕奧卷阿頌獻盡臺閣之名言浚長書傳
通形聲之雅訓論文惟其是無後儒門戶之私舉筆不忘規
受平日身心之益兼之夙耽清靜力戒驕奢室少侍姬門多

正士助儉勤於一己示禮法於後人以故才裕經綸令子著
當官之績名高節烈諸孫成報

國之忠也

下亦同前牘

可園文存卷十四目錄

賦上

對月賦

旅館燈賦

秦淮秋柳賦

金陵懷古賦

采石磯訪太白樓賦

紫光閣功臣像賦

益山新建縣學堂賦

擬馮敬通顯志賦

擬木元虛海賦

擬潘安仁藉田賦

佛手柑賦

幽蘭賦

水仙花賦

月桂賦

瓢兒菜賦

可園文存卷十四

江甯陳作霖伯雨

賦上

對月賦

并序

辛酉

予旅寄鳳陽嘗於下元之夕與客宴集今忽忽已四年矣
轉徙湖鄉又逢令節撫今追昔聊爲賦之

歲星在酉月令逢冬其日旣望其宵方中雲陰壓屋雨氣浮
空風砭肌以栗烈月當頂而朦朧主人獨坐有客過從徘徊
平茅茨之室指點乎斗牛之宮欲聯吟而尅興思款飲其誰
同憶西軒之雅集忽惆悵於寸衷迺愀然而問主人曰吾子
濠梁舊人也曾亦思往日之事乎皓月蟾圓文星屬至官閣
新聞賓筵凱醉戰拇有聲藏鈎爲戲詩雜僊心筆凌雲氣月

可園文存

卷十四

且定評風流雅致五夜同歡兩年一例曾幾何時遂歸淩替
苔升壞檻草沒深坳半堵牆圯一片土焦老鴟夕叫妖狐晝
嘒陰燐碧冷野火紅燒城荒雲壓角響霜高河山破碎壇坫
蕭條盛筵不可再雅興詎能豪唯餘清冷月夜夜挂中霄若
夫南邦騷客高陽酒徒風流雲散食走飢驅或流連於幕府
或飄泊於窮途或假館於鄒里或飲痛於黃壚徒令予遠道
怨長重泉恨隔伯牙碎琴向秀賦笛心戀墜歡感生今夕安
得如月之徧照兮無分海角與天涯安得如月之永在今無
殊古往與今來此固無聊極想也當亦吾子之所共哀客辭
未終泫然改容懷人傷逝悲憤無窮主人聞之憮然爲閒若
勸若諷逡巡而言曰客休矣一盛一衰自然之理子無外求
請以月比其三日而現今如萍水之初見其三五而盈兮如

騷壇之聚盟其三，五而缺兮。如關山之闊別，月尙滿而復虧。
兮人豈能合而不離，悟斯理之有準兮。曾何恨乎睽違，矧先
民之有言兮。當及時而行樂，幸爾我之二人兮。初不嫌其索
莫，雖無酒以共斟兮。猶有筆之可橐，倘對景而不怡兮。徒感
歎之交作，將取怨於姮娥兮。問清光其焉託，恐薄暝之難開
兮。虛良宵而無著，客笑曰有是哉。於是相與吟嘯，坦爾忘情。
開戶而望天，淨月明。

旅館燈賦

并序 甲子

予客遊姜堰歲莫有懷一燈熒然倍增岑寂戲爲此賦體
仿晚唐

夕月初落停雲乍凝，客愁如草齋冷於冰間。有誰兮相伴，指
一盞之寒燈。當夫途路甫經，鄉關在念。馬顧影而奔槽，人望

光面投店模糊詩草借他讀壁上之題拂拭雄心照我解腰
閒之劍及其淹留客舍振觸愁城一點兩點三更二更耿出
疏光獨客之星可喚寫將瘦影故鄉之月同明爾乃攤書燭
讀沽酒初來一窗風雨其守千里關山未回喜良友之忽臨
暫將燭翦卜家書之遠到定有花開旣而擁被孤吟傾壺盡
醉撲任蜚飛飢憐鼠伺帳深紅透歎鄉夢之難成風閃青微
感寸心之同悴豈無寄居京國得意仙班玉漏常待金蓮送
還劉向校書然藜光於杖末馬周具草映火色於眉閒無如
落魄偏多浮蹤無著射近紙窗明從竹閣迴憶兒時有味條
爾蹉跎料將闌裏相思同茲冷落噫嘻吁天陰易晚夜永如
年燼將落而未落人似眠而非眠那堪老大飄零銷年華於
客裏行見團樂笑語聚兒女於窗前

秦淮秋柳賦 并序

淮水之濱舊多垂柳自經兵燹存者寥寥今於泮水南岸
補種數樹時當秋暮楚楚可憐過之者不勝感舊之思焉
賦曰

青溪渡畔紅板橋邊見夫淡黃漏日衰碧籠烟疏難繫馬冷
不鳴蟬潮痕平而漸落人影瘦而尤妍問長淮於終古玩弱
柳於今年秋心如此秋興蕭然昔之綠水鏡平紅樓霞起豔
曲聞鴛彩船集螳筍弄響而徵歌酒颺旗而成市畫閣則千
家萬家長堤則十里五里莫不嫋嫋迎風依依覆水舞垂手
而攔憑闌畫眉而妝理招涼丁字簾前修禊小姑祠裏滄桑
變幻金粉寂寥有株皆伐無土不焦失陰濃於夏晝流鳴咽
之春潮雖復江山無恙瘴霧旋消而地偶尋夫北里勝莫繼

夫南朝林空巢燕月黑啼梟城催畫角橋歇瓊簫憶千絲之
旖旎經三軍之采樵補種何人添愁此地舊院攀芳鍾山割
翠較松柏而易成與芙蓉而競媚瑯邪城裏風情講武堂前
姿致況當搖落江天蕭條涼吹流水有情春風無意露簾額
於綺窗閣鐘聲於古寺清霜之瑟瑟初零涼月之娟娟欲墜
永豐吟白傅之詩江左動子山之思歌曰秋晚暮潮平涼颿
逐處生渡江名士老顛顚不勝情又歌曰建業山河久息兵
漫將小劫說昆明來春一片鶯聲好盡是承平鼓吹聲

金陵懷古賦

有客問於金陵主人曰夫覽山川之名勝者必親涉其四封
也談人物之豪侈者必仰企夫前蹤也繫金陵之舊域據大
江之要衝西連姑孰東下吳淞北顧廣陵之沃壤南瞻宣歙

之攢峰控下游而建雄鎮度中土而立崇墉民居則相連相
屬市里則一橫一縱地多冠蓋家有歌鐘峙城垣之壯麗樂
士女之雍容故凡遊其地者每溯習俗所由起而知王氣之
曾鍾蓋自楚威作邑埋金於山丹楊之郡志考史班逮孫吳
而建國拒曹魏而閉關經永嘉之南渡慨東晉之多艱齊承
宋禪陳較梁孱卽南唐之弱小亦割據於其間當夫遊呼獵
騎醉擁雲鬢詩歌麗而競闢樓閣高而莫攀雖荒淫之不免
皆風雅之素嫻豈地氣使然歟何其文采之爛斑也維時翰
墨之士蔚若雲從善書子布能詩士龍儲史材於孫盛開儒
館於次宗徐孝穆玉堂格創江總持璧月習濃延巳之曲則
豔於熙載楚金之學則本於叔重莫不墨花燦錦筆陣鍊鋒
日月資其藻繪星斗羅於心胸然而逞才者德行必薄右文

者武事誰供氣失於柔靡性偏於疏慵此亦南人積習也曾
何足以勵節義而銘勳庸況夫院尋寶誌塔訪長干淵湘宮
之龍隱感蕭殿之蛇蟠達摩留面壁之洞臺城建施食之壇
續命燈於聖火聳傑閣於瓦棺經繡梵夾香雜旃檀岩深日
古雨落花殘贖身者帝主捨宅者達官虛無崇其象教慧定
返其內觀棄正道而尊佛法洵不免溺於異端吾子博通舊
典亦能爲父母之國洗其垢癥乎主人曰唯唯維我金陵帝
王之宅天塹可憑南北是隔非專任夫干城疇疆開而地闊
在昔周郎拒曹王導討逆祖豫州楫擊中流陶士行壘開白
石嶠慷慨而登壇安從容而折屐作鎮昇州者李神福請幸
建康者陳康伯固已據險陳師臨江立柵乃佐命之元功至
有明而益赫其起東南而控西北爲偏安一振其頽風者莫

非徐常鄧沐李湯之碩畫若夫乾坤板蕩家國殷憂矢忠貞
而奮發鄙時世之優柔則有山高蔣尉臺表周侯卞侍中終
於大桁袁愍孫殉於西州韋粲捐軀以力鬪羊侃鬱志於雪
仇雖五季之頽靡猶浮沈之是羞孫晟不辱君命陳喬恥作
俘囚高彥戰荅李雄用矛慘昇元之閣裏哀樂官之山頭伊
捨生而取義豈不可作砥柱於中流至於經術湛深名儒復
古博辯則閣比石渠雄談則觀齊白虎唐固作國語注箋劉
歙說三禮通詁吳苞講論語之篇范雲誦毛詩之譜法得師
承見融門戶羣書會其統宗聖道豈無小補矧性學之振興
更先賢之畢聚政佐上元則程明道之涖官主簿也室號南
軒則張敬夫之讀書寺廡也注采鄭何統承鄒魯繼往古以
開來今何慮邪說之簞鼓若客所論徒撫拾其小疵而未思
可園文存

其永譽亦地理之考證多疏故史傳之人材無據也倘能味
乎斯言獨深饜飫知鍾毓之有神惟英豪爲最著觸類引伸
迴心易慮博覽輿圖歷觀志疏將見識見日宏豈非賴江山
之助乎客於是命駕遨遊醉歌箕踞尋靈秀之區探邃幽之
處旣已登鍾山泛秦淮遂揚帆渡江而去

采石磯訪太白樓賦

有冶麓山人者夙好探幽情殷懷古泛如葉之舟過新林之
浦遂至於采石磯邊而小停柔艣於時風日和和波濤不怒
岸柳青垂山花紅吐聞高樓之尙存未終淪於草莽欲拾級
以誕登謁盛唐之詩祖爾乃繫芒屨曳藤杖攀厓以升循塗
而往望太白之神祠慰平生之景仰則有老衲迎門相逢合
掌導之栗階敬瞻遺像肅烏帽與宮袍送靈風兮颯爽羌周

覽之未終訝後山兮何敝有叢生之筆蘆雜星竹以俱長問
埋骨其何年路崎嶇而難上廊迴路轉有樓在斯三楹小築
數仞非危躡丹梯之歷歷乃高出乎雲達於是雕欄倚繡幔
披南眺歎阜北望淮湄皖公之山光西挹建業之江水東馳
迴眸四顧心曠神怡問謫仙其焉往將折藥以遺之且夫太
白以天潢之彥列侍從之班醉誇鯨吸歡動龍顏過酒家而
酣臥謁金殿而朝遣寵榮無比嘯傲多閒無何忌生力士讒
沮玉環浪迹金陵之市寄居匡俗之山夜郎一謫赦詔旋頒
其遊當塗采石也蓋在於上元寶應之間顧愛青山情何能
已老而倦遊終於此矣惟同族之陽冰令當塗而戾止故人
之情爲之經紀封墓作銘篆文聳峙前建神棲香烟崇祀若
斯樓之崔嵬其殆肇基於是乎奈何世事屢見遷移潢池之

亂樓已傾敝荒榛藏兔老樹鳴鴟鴞亂飛而墜瓦螭踰伏而
留碑今雖規還舊制高踞山陲闔薨壯麗尙遜當時窺壁無
蕭尺木之畫挂帆憶袁臨汝之詩西江明月終古相隨自憐
非質尙友昔人讀翰林之遺集遂異代以相親況當流連名
勝想像精神左招賀監右挾汪倫桂樹之秋風漸晚桃花之
潭水長春願營塵兮是託守祠宇以終身乃起而爲亂曰采
石之濱先生所宅騎鯨以升杳然無迹妄語流傳醉撈月魄
荒冢式封言藏履舄誰與建樓螺山映碧觴詠相尋風流主
客雖歷滄桑依然百尺倚傍一空有如詩格

紫光閣功臣像賦

有畫苑小史問於直廬大夫曰走以衰暮之年及見

中興之始湘淮二軍水陸並駛相略將才羣推曾李僧忠親

王首屈一指應運而生勲實偉矣茲乃

詔圖諸功臣像藏於紫光閣中奉命悚惶勉呈薄技其冠則瓊弁玉纓其服則銀青金紫或綰印符或垂鞭弭第不知後起之英亦能與

先朝濟美乎子大夫掌故夙諳請爲溯斯閣之緣起直廬大夫喟然而歎曰善哉問也僕嘗以內廷供奉過金匱玉璽之坊池循太液波流湯湯門闕洞達乃轉斜廊有巍峩之棟宇日激射而迴光是爲圓殿屋瓦皆黃

錫武成之嘉號屹焉立於中央弓矢旗纛於此尊藏櫜櫓四接周若城隍仰三層之傑構爰拾級以升堂百尺崇基明人所作後廢平臺遂建爲閣旣看御馬監之嬉又縱闔龍舟之樂我

朝監殷躬行儉約因其所因不勞改創榆柳垂條杏桃交萼
樹影池陰深如林壑避暑而奉

安輿校射而張

御幕此不過因時制宜也而究非典禮之攸託欽惟

高宗純皇帝之踐阼武功著文德敷命凶門之將恤羽林之
孤眷言勲舊是究是圖謂

世祖畫范文程之面目

世宗畫岳鍾琪之肩須雖儲藏於內府猶未足報其馳驅因
仿漢麒麟閣唐凌烟閣之例而特闢勝區自乾隆二十五年
以爲始伊誰不奉此成模且夫準部先滅回庭繼空斯乃傳
恆兆惠輩一百七人之效忠也烏圍旣克噶崖旋通斯乃阿
桂豐仲額輩五十人之卽戎也臺灣海戰廓夷而攻斯乃福

康安海蘭察輩兩役相倚以成始成終也歷六十載奏

十全功無小無大爾侯爾公借丹青以圖寫豈尋常行路所能同逮至道光之初元承平日久徭賦不均有張格爾架穆難馴乘武備之廢弛遂闖入我卡倫大張撻伐楊芳遇春胡超猛進奮不顧身長齡秉鉞國之虎臣禽渠獲醜

廟算如神午門受捷仰荷

恩綸亦復丕承

前烈召畫師以貌其真若夫粵捻之平其功無兩颯爽英姿允宜繪像今爾乃以設色之工馳夢求之想乘興揮毫拜恩賜帑而復有志於舊聞欲窺夫穹壤其如分屬草茅不能歷階以上惟有狀厥容顏述其題榜庶令薄海臣民皆悠然爲之神往爰作頌曰於穆

聖清紹明祚兮

建都燕京金湯固兮盪寇平夷

皇赫怒兮風虎雲龍慶相遇兮戚里郭陰競攀附兮世族豐
岐篤舊故兮帷幄運籌資裕度兮沙漠推鋒從信布兮飲至
勞旋扶杜賦兮高閣戢戢規模具兮劍佩衣冠儼翔步兮康
非沙博螽非鑄兮下筆有神摹無誤兮雖爲執鞭所欣慕兮
盍山新建縣學堂賦 并序

維光緒二十有八年

詔改天下書院爲學堂其教育宗旨以中學爲體西學爲
用凡府廳州縣之官吏皆敬謹奉行毋敢怠忽於是上元
江甯兩邑并設一區以教所屬之童子卜地於盍山之陽
因惜陰書院之舊址爲之而劉忠誠公

奏請以予爲總教習開辦至今年有餘矣規制粗定羣士向風謹撮其居處之靜爽樂育之宏通宣德類情製爲斯賦其辭曰

繫金陵之奧區設兩縣以倚郭維上元與江甯乃分轄夫南北其閒田疇墾闢市里喧闐閭閻比櫛英彥駢肩尙儉者甘藜藿好奢者耀冕軒苟不範之於中道奚以化情性之偏維時江南制府方奉壬寅之

詔書修戊戌之新政下飭所司各率職條而首舉興學以申命訓辭深厚播於羣聽蓋欲薪棧樸而呈材非別啟仕途之捷徑也且夫蒙養聖功基於童子渥洼神駒志在千里摧剛制躁牯牛獷豕凡我長官勿輕穉齒俊秀迭升自小學始爾乃步原野陟峯巒相陰陽之向背測水泉之溫寒近挹乎爽

氣遙隔乎塵寰占著龜而襲吉遂奠宅於蓋山茲山也迤邐
坡陀堆阜突怒南逼城闔東通衢路龍潭波流與濠灌注堯
西北之一隅列雲嵐面回互昔者孫吳定都雄關虎踞諸葛
東翔高坡馬駐控形勝於石頭實川原之佳處瞻彼山麓舊
有精廬種松四粒栽梅百株桂雙幹以御立竹萬竿而不枯
鄰印心之石屋乃陶公之所居惜光陰以分寸惟祖武之步
趨因錫爲書院之號勉多士以通儒安化陶文毅公淵賢兩
江建印心石屋於同松
菴中因推其旁爲惜
陰書院以謀終生八十年來中更兵火旣廢復興青衿列
坐競鬪詞華雕蟲瑣瑣騰紙上之空談稱經濟其未可則欲
易無用爲有用必洞達夫古今而不鄙族類之非我況乃功
令森布文運轉移罷館閣之賦免場屋之詩諸生星散博士
告歸講肆茂草改作允宜然猶慮匠作之力殫水衡之錢竭

不足以大起宏規也於是因陋就簡扶顛持危補其罅漏窮
厥茅茨勝綿蕞之在野幸杏壇之有基不別築夫牆宇不塗
墍夫髹泥告成功於不日召學子以偕來殆彷彿乎文翁之
石室茂叔之濂溪馬高門大啟廊其有容繼升龍事極直極
隆踰丹墀以歷進層樓矗立乎其中供

龍牌之巍煥擬象魏之高崇值

萬壽之聖節乃相率而呼

蒿中庭靜深位尊孔子朔月月半衣冠萃止極拜跪以致虔
學不忘其所自有夾室以奉羣師庶合於瞽宗之附祀循修
廊以左轉捲疏箔而豁開圖書羅列几席安排上以延夫朝
貴下以接夫朋儕名刺通於典謁爰揖讓而升階朝饗夕飧
會食有所少長咸臨什什伍伍有喰其聲不驚匕俎能味至

可園文存

卷十四

十

道之映上下遂同其甘苦官師退息左室右房琴劍在側燕
寢凝香總諸科之教育必各守夫憲章則有秘籍珍藏渾儀
玉鑿古色紛披精光灼爍建康以紬書築樓葛嶺以多寶名
閣入室縱觀爰咨爰度其後則長檐廣廡幽奧軒昂梯高砌
遠門閤相當各有定處鳥歸巢藏迨鼓大听以警眾始羣集
於南北之講堂懿夫講堂之爲制也五楹顯敞八牖通明簾
垂珠絡窗嵌水晶冬安爐而火熾夏懸扇而風生縮地之圖
在挂報時之鐘自鳴中設高座其飾舉比闔凡觀聽不名一
師以五經爲根柢本唐虞三代之遺四子之書亦簡亦奧以
之修身獨得其要歷朝治亂史鑑載之全球輿地朗若列眉
旬有課而月有考憑策論以發揮中學既通延及四裔缺舌
音殊象形體異僭侏辨其語言佞虛識其文字通夷夏爲一

家何待傳辭於棘寄其餘格致之理變化之方心知頓解目
驗能詳簡吸水而絲引火金流質而電騰光莫不探源於測
量之圖繪鈎稽之算法藉得以兼擅其長然而儒緩可羞宜
崇武事衿裙急裝距躍爲戲練手足之輕便固肌膚之際會
可以衛生可以習藝舞象勺於童年猶是先王之遺制由是
佩觿之輩弗角之倫因端竟委溫故知新守無邪之旨樂敬
業之萃師不以門戶自隘類不以朋黨攸分三年積其資格
萬國擴其見聞舉凡西洋之教南海之教東亞之教皆洞悉
其情僞而不以亂吾之真所願將相之才皆從此出俾後人
之過盜山者咸仰之如龍門而豈雞籠山之儒學館冶城山
之總明觀所可同論也哉重曰建業秣陵夾秦淮以爲治今
篤生羣英秉鍾山之靈氣兮髫齒韶顏懼荒嬉之爲累兮按

候程功法百工之居肆兮誦詩讀書探羣言之精粹兮秉翟
執干習身體之勞瘁兮步算持籌仰窺天而俯測地兮革書
譯辭設象胥而招夷隸兮教養兼施該本末而通中外兮恭
奉

綸音息邪說而申正義兮學如牛毛麟角之成可待兮跂予
望之五百年必有名世兮

擬馮敬通顯志賦

依原韻

仰瞻天宇兮白雲英英日月不處兮旣邁而征逝將西遷兮
載辭咸京顧藐躬之孑立兮撫襟抱而自傷鄙權謀以不用
兮乃拘守乎故常老冉冉其將至兮悲意氣之不揚感時世
之詭隨兮每好同而惡異惟節概之激昂兮實余心之所慕
奈漢運之當厄兮幾卑靡之成風獻符命以希榮兮亦祿位

之是耽履新廷而不知恥兮辭昭昭而入冥冥非聖人之出
類兮疇則可以踐形守素志而不移兮乃吾心之固有雖困
阨之屢逢兮終堅持而不改日誦法乎詩書兮勵舊業之精
勤任岳牧之交薦兮不敢易其初心值兵戈之紛擾兮嗟蕩
定之無期尋箕潁以隱淪兮難追步於巢由應幕府之微辟
兮夫豈不思其反歎吾謀之不用兮遂日卽於疏遠遭逐捕
而亡命兮聞浩浩之河聲望龍門之聳峙兮傷身世而涕零
欣上將之戾止兮欲安集乎民生詣軍門而獻策兮將以啟
世之晦冥蒙側席以相求兮不復責其尤悔辨羣議之是非
兮常深思以至再仰威風之遠暢兮若雲霧之盡披樹甘棠
以布惠兮釋百姓之愁悲營屯田以自給兮據太行之崢嶸
加立漢之軍號兮余亦得與於顯榮邁聖帝之龍興兮旣人

歸而天與愛并土之幽深兮猶自敦其古處戀故主之恩私
兮恐傳聞之難信爰閉關以自守兮昧惟德之是親賊同盟
之背戾兮致孤忱之難達同防風之後至今幸未罹夫誅伐
羌卑官之不辭兮令曲陽而小試製美錦以成文兮固眾人
之所識誅劇賊之暴橫兮立功名而可慕恨爵賞之不行兮
誰克登夫要路痛讒慝之日深兮實有累於盛德當苞苴之
通行兮羨陶朱之貨殖復上書而不報兮棄賈生之謀策隔
天關之萬里兮幾虎豹之交跡浩長歌以辭闕兮欲遠遁以
投荒得侯門以栖止兮亦寄居之可傷企平原於趙邦兮就
孟嘗於齊國作食客以自託兮豈傾袞之眩惑經有司之劾
奏兮達姓氏於王廷謂貴戚之豪侈兮本坐食夫稅租何賓
從之難還兮竟炫赫於兩都恐第宅之高亢兮將再過而爲

墟彼交遊之競進兮皆不知稼穡之艱收狴犴以行罰兮庶
絕人事之紛紛乃蒙赦而得歸兮實聖朝之寬政惟杜門而
不出兮幸保全夫生命絕親故之慶弔兮泯當事之猜疑溯
祖宗之功業兮每念茲而在茲當周秦之交際兮悼弓冶之
將傾暨炎劉之中葉兮遂大樹其風聲泣鴻臚之劇職兮與
公卿以爲朋得萬石之顯號兮知後嗣之繼興列戚里而承
寵兮晚乃遭夫奇禍實當熊之兆釁兮因行遯於荒野倏天
地之板蕩兮交鋒鏑於神州慘生人之塗炭兮決滄海以橫
流迨四海之清晏兮哀素髮之如絲聊俯仰於今昔兮戒出
位之是思念王室之再造兮拯九土之離崩聚四七之碩輔
兮建不世之奇功乘風雲之會合兮旣轉弱而爲強始奮跡
於南宛兮終掃盪夫雍梁欣右賢而左戚兮若古人之復作

封異姓之十臣兮爵同宗之二號凡懷才以求遇兮皆仰荷
夫深知從鳳鳴之節足兮隨鴻漸之羽儀胡坎壈之不免兮
祇自恨其微生顧時運之多蹇兮情抑鬱而難平但堅白以
立身兮難委蛇以從俗未得升於喬柯兮反深入於幽谷悟
兀傲之陵人兮悔丰裁之太峻宜默飭夫廉隅兮毋徒逞夫
高論況京師之首善兮口相競以豪奢萃四方之遊俠兮孰
不爲夫聲華耀裘馬之輕肥兮有郭杜之遺風騰冠蓋以相
接兮不復數夫五陵以貧薄而處此兮將見哂於羣流雖百
年之易逝兮誰悟今古於一邱憶先人之幽塋兮無歧路之
迷惑因渭陵而稍徙兮爰卜兆於極北陟新豐以顧盼兮歷
鴻門以仿佯樂地勢之高敞兮無蓬蒿之翳明非乞葬於巖
邱兮爲後世之深慮晞河華而哦艷鄙兮亦流連而不能去

嗚呼幸未變遷兮奈歲時之不我與尋蕭蕭之松柏兮披離
離之不黍展吳墓於延陵兮詠周詩於河澣築一室於壇場
兮聊望衡而對宇亮吾道之不敝兮必先植夫三綱既命名
而爲人兮宜前輝而後光倘烝嘗之久廢兮徒翹首於橋山
慕黃帝之遺蛻兮棄衣冠而上仙將俎豆之森列兮亦徒付
諸杳冥昧顯揚之爲孝兮尙可冀後來之俊英繫我祖之不
遠兮出西域而立勳曾未逮夫五世兮流君子之清芬功既
成而作樂兮方歌頌之洋洋知身沒而爲靈兮必生存而爲
英慨後世之不振兮以門子而當室經播遷而無歸兮復不
愼於擇術懷忠信以爲主兮適大道之坦夷有羣女之謠詠
兮謂先施爲不美攬靈均之香草兮非斯世之所貴爰辭尊
以居卑兮且自安於憔悴念揮霍夫千金兮固丈夫之志操

惟貨賄之充盈兮乃足以饜夫好樂指邊地之肥饒兮積草
木之蕃茂有眾獸之奔馳兮亦或羣而或友縱游獵以自娛
兮嘗守之以靜鎮嘉民俗之古樸兮每虛寂以養元求芻牧
於牛羊兮與童豎以相親喜生產之日富兮何致勞其形神
展宗廟以盡孝思兮分昭穆之定位講道德與仁義兮見孔
老而髣髴保松喬之壽年兮不崇尚夫異術視軒冕如泥塗
兮全終身之大節陟隴阪以四望兮志淩雲之或同任塵世
之溷濁兮亦何爲而不容

擬木元虛海賦

禁用水旁字

昔在上古天地初分真機橐籥元氣氤氲凝積塊而成地噓
空噫而爲雲乃有隔閼三條綱維兩戒岷山蟠冢殊其疆桐
柏崑崙別其界來途經萬里而遙地勢嫌中原之隘歷萬折

以奔騰欣歸墟之已屆挾百谷而委輸實宇宙之奇快猗與
大壑神若所都牢籠九有包舉四隅控青帶究下引越吳甌
閩交廣特爲輿區訇隱訇礚振動輿圖羌寰宇之逼處已極
目而睢盱若其地出土中境開天外聲勢喧阗陰陽含蓋諸
島紛羅羣夷交會貫胸黑齒不得逞其奇軒轅毘騫不敢侈
其大通重譯而來王仰盛時之安泰當夫碣石突兀扶桑清
葱天雞一叫旭日升空金光晃朗倏西倏東幻玻瓈之一片
徹上下而皆紅旣而羲御過歸璘車遠駛俯仰天光一碧萬
里彼巨艦之巍峩曾不敵於一螳欲縱目而遠窮直莫極其
所止若乃雲霧晦冥頃刻萬狀天吳截途馮夷森仗恂兮恍
兮氣象惻愴加以長空嘯氣颺母怒號熊咆龍吟眾聲敖嘈
帆不及卸楫不得操風一吹而觸石輕性命於秋毫神愕眙

其莫定幸奇險之能逃倏氣平而勢靜又欲快夫嬉敖盡其
富媪蘊奇中無不有文鯨能飛長鯨善吼巨鼈戴山魁羸配
斗蜃吐氣以成臺螭相黏而爲阜卽至於牡蠣蚌珧烏鰂石
首堅甲長鬣利鱗巨口種類蕃息形狀怪醜莫不負日翕張
隨風奔走又其上者則九天之龍乘雲往來噴而降雨怒則
奔雷陸魚服之嬉戲何豫且之見猜矧復珍錯鱗萃瑰異星
鋪文貝瑱瑁鐵網珊瑚堂庭之玉鮫人之珠動心震魄何有
何無繁稱名之莫辨愧西域之賈胡至若煮鹵爲鹽亭場揮
掃如雪之飛如霜之皓經焚鍊於半盆本生成於大造管仲
資以富強吳王養其衰老佐貢賦於天家寶國中之至寶則
有安期羨門麻姑蔡經食瓜棗之纂纂感桑田之青青排風
馭氣蘊爲精靈哂蓬萊與方丈識列仙之所庭瑤草夙種琪

花自馨丹竈烟歇藥杵聲停青鳥探之而路遠大魚守之而
風腥燕昭不能究其術秦皇不得見其形營窟宅之幽阻寄
瞬息於千齡乃知坤厚能載坎受以虛德無不納量則有餘
謙卑自牧變動不居顯端倪而畢露合巨細以皆儲其發也
莫知所自起其有也孰詳於厥初窮宣暢之所及達強名爲
尾閭且其爲瑞也朝陽呈彩川后獻珍包乎有象周於無垠
龍宮候景罄容垂綸風不出隧地不揚塵寰宇如鏡和氣常
春嘉徵不應媚茲一人

擬潘安仁藉田賦

維皇晉泰始之四年庸蜀歸版雍涼款邊天子以海內無事
追古聖之墜典遂躬率羣臣以耕于藉田禮也若夫月屆孟
陬辰加丁未春風扇和嚴霜斂氣蒲叢叢以碧抽杳灼灼以

紅沸望原隰之縱橫刻龍鱗其髣髴土膏潤而墳起兮待聖
皇之經緯其地則前臨洛水背倚北邙右瀍左澗流波湯湯
伊闕聳峭以迢遞金墉旁帶而延長繁厥壤之平曠兮利實
宜乎黍稷非我后之克勤兮疇知重夫井疆於是下詔勗農
前驅警蹕百官盛儀鹵簿乃出太宰驂乘實惟元弼侍中尙
書左右載筆矧農政之是掌有司徒之專秩爾乃戟植虎賁
旗揚豹尾黃屋戢戢朱旄煒煒千乘震地以殷鑠九旂象天
而斐亶奉引導前扈從攢萃金鉦鞀鼓喤吹鞀鞀以幸乎帳
殿之次天子乃御神壇祭先嗇巡陌阡履封域取黛耜於紺
轅躬三推以作則終千畝而助勦勉庶人之自力於斯時也
勳臣歡忭武夫騰驤謂大君之斯舉洵有益於邊防溯自炎
精中圯政令無常廢農事而不講遂大毀其紀綱山東兵起

百姓流亡拾樵採稻儲以爲糧蒲葦螺蚌軍食是償幸魏武之崛起募墾田於許昌用聚祇之本計畜萬斛於斯倉置田官於郡縣民始慶夫豐穰逮徐邈之經畫開水利於西涼有袁渙與胡質軍屯同置而富強況廣田以積穀詒謀莫善於宣皇作藩南國利溥江淮大軍所至鳬藻和諧惟征南師其遺意開民田八百餘畝於襄陽漢水之涯今天子又親耕以率之其運籌廣遠蓋削平吳會之梯階也乃有掌禮之官進而稱曰夫三代之遺制固非俗見所能拘也昔成周之御宇有家相之勤劬制典禮以教孝載耒耜而親扶駕蒼龍於郊甸冕垂紘而染朱登秋成於御廩供郊廟之簋瑚自宣王之不藉成憲委於泥塗雖漢文之修舉猶簡略而多疏經永平之潤色乃備儀於屬車茲當四夷來王萬方率職無小無大

載播載植獻祖考以精誠立後王之法式豈因島夷之稽誅而始勞登陟也於是天子有睟其容不愆厥度既禮成而無違戒先驅以復路開勞酒之廣筵頒祈年之福胙惟余小臣躬襄慶祚染翰爲文昧愚是懼敢作頌曰靈雨其零土膏脈起穆穆皇皇大君戾止以我覃耜置於車中縱橫冠蓋右卿左公禮始三推自五而九我稼旣同十千維耦上以教孝下以勸農化洽萬國莫不朝宗

佛手柑賦

祇林修到慧果證成法身未現輪掌先呈伊兜羅之綿輭受供養於化城爾其葉有刺生實偕柚熟黃甘竊名朱欒非木欲象真形合從天竺清晨薄暝甘露滋培是若慧可割臂初開向晚放晴明月涌起是若如來當頭相指枝格交加輕風

不息只葉繡經若優婆塞庭院清幽微雪忽聚奇花偶拈若
靈山祖淡黃色染照眼迷離又若尊者金臂下垂素芳風送
撲鼻欽遲又若居士香鉢曾持其尖或縮誰悟機先天龍座
上豎指參禪其掌盡舒孰知下拜弟子班中摩頂示戒不後
不先兩兩相及比邱上人禮勤合十亦錯亦綜樹樹相連觀
音自在體具大千美形容今不盡問修煉兮幾年有印堪結
無言可詮分莊嚴之一體獻清潔於諸天則有詞客書窗特
商位置悟金粟身解木樨義彼文字之機鋒仗空拳以相示
乃說偈曰菩提非樹蓮花非龕茫茫塵劫我法誰諳去來今
理彈指可參金剛不壞有如此柑

幽蘭賦

嗟塊然以獨處感形影之深藏當輕風之徐襲雖無人而亦

芳守孤高之本性奚闐寂以自傷於時月淡猶明露濃不膩
品自有真色無可媚氣以靜而逾沈神雖清而不賴卻雕飾
於春華得天然之丰致夫何蓉荷吐豔蕭艾成林幸臭味之
各別知塵坳之難侵初紉香以作佩複製曲以操琴抱微馨
於爾室通至德之悃悃思伊人而不見聊相託以素心

水仙花賦

碧天浩渺海山秋蓬闕高寒弱水流中有仙人呼欲出瑤環
玉佩步虛游翠袖淩寒倚花魂嬌不起相望情如何盈盈隔
一水洗紅唱罷有遺音獨對幽芳靜撫琴一自成連海上去
更無消息到如今蹇修宛轉求靈匹容與中流歌吉日江上
峯巒不斷青竹枝罷鼓湘君瑟湘水悠悠漢水清水邊游女
喜將迎瓊華一語遙相答解珮江臯江月明伊洛車塵淩曉

發宓妃微步波侵襪贈枕徒留未了因魏宮迴憶瑤臺月獨立整花鈿冰心冷愈堅瑤京通舊夢極浦證新緣西湖祠宇靈風起配食空王佛座前

月桂賦

蕭中月桂既枯復榮賦以誌瑞也

幽齋盆桂應月而開骨傲虬瘦孕隨蚌胎偕菊英以吐豔任

花爲古人所賞

冀莢之交催底椿樹而不落自竹林而徙來

先君嘗賞

之影伴我今廿餘載歲賞伊兮十二回叵耐去秋形神枯槁津竭雨餘葉零霜早品雖列於名花色幾類於衰草蛛牽惹而相纏蜨伶俜而莫把玩盈缺於蟾光傷姮娥之易老何期弱卉夙具靈根時運偶否生機自存驗候琯而調律聞奇香以返魂秉玉燭至和之氣留金剛不壞之身萃細縕於一室見天地之長春猶憶昔年麗春生園並蒂同心爭榮擢秀悵

罌粟之俄空喜木樨之復茂繪花瑞以成圖

瑞花館以罌粟並蒂同心命名

藏有圖冊麗春罌粟別名也

豈瞠乎而在後眷余情其信芳期歲寒之共

守月復月今年復年花與人兮同壽

瓢兒菜賦

爾其積雪封畦凍泉凝壘羹煮行廚酒沽村店根蔽菜以逾
香葉類瓢而可驗草草配杯盤之用莫笑家貧悠悠結瓶鉢
之緣竟爲僧占當夫菜甲初抽園丁徧灌抱甕人來提壺鳥
喚形不剖而亦圓把非珍而可玩想是元修種出重爲席上
之珍渾疑顏子飲餘棄作溝中之斷俄焉鱗揮白木藍荷青
筠操常在手負亦隨身版鉏玉兮雜筍股折釵兮思蕪若教
挂樹迎陽山同隱許恍似浮匏渡水源不迷秦已而清湯沸
釜活火添柴冰痕盡化風味尤佳異辛盤之取氣笑午食之

如齋綠玉可餐經幾度游仙崑閬緇塵倘洗悔半生浪迹江
淮於是詳究土宜頻稽物候桃渡葉浮桐灣莢茂知遷地之
弗良亦耐寒而獨秀相貽菜把名合錫以長生莫棄破瓢情
更殷於戀舊傳品無雙珍蔬第一采並藥苗釀偕椰實未登
幽雅之圖經藉驗唐家之詩筆風過而動搖翠圃來吳宮劇
地之人雪晴而斟酌素筵想蕭寺打齋之日是蓋形摹畢肖
會啟率真因物付物食貧非貧黃簇菊而心嫩碧敷菘而色
勻但期長柄瓢傾天上降滂沱之雨不待油薺菜老江南成
爛漫之春